

DIZRA' NÉDXUDAU' DA BZUAJ SAN JUAN

Xtizra Dios da dxunna na xel-la' nabán li lazre'

¹ Dxuzúaja' cheēle da nigá ca naca cheē Bénnea' zúaquezē' gate guzú lau zua xúgutē da dxelé'edxu. Dxuzúaja' ca naca cheē Bénnea' ba bénentu' cheē', ne ca naca da ba blé'equezentu' benē', neda' ne xezícadxa benne' ca' bsēde Jesús. Ca naca cheē Benne' nigá guzúantu' dxennantu', ne btantu' Lē' nen na'ntu'. Dxuchálajntu' ca naca cheē Bénnea' naquē' Dizra' da dxunna na xel-la' nabán li lazre'.
² Bénnea' dxunnē' xel-la' nabán zeajlí canna ba blé'ē, na' netu' blé'entu' Lē'. Dixiruj béantu' da naca cheē', ne dxuzentu' le'e ca naca cheē'. Léquezē' zúalēnē' Xradxu Dios, na' blé'ē naga zúadxu. ³ Da blé'entu', ne da bénentu' dxuzentu' le'e cheē gácale tuze nen netu'. Da lítegaze, nácadxu tuze nen Xradxu Dios, ne nen Jesucristo, Zri'ine Dios.
⁴ Ca naca da caní dxuzúaja' cheēle cheē gaca du lazre' xel-la' dxebē cheēle.

Dios naquē' lení' cheē xichaj lázrdau bèneache

⁵ Da nigá naca dizra' da bchálajlē Jesús netu', ne da dxuzentu' le'e. Gunné': Dios naquē' lení', ne quebe bi zúalē Lē' da naca cheē da chul-la.
⁶ Che dxennadxu nácadxu tuze nen Lē', na' che dxundxu da naca na cheē da chul-la, dxun lázredxu ca naca da dxennadxu, na' ca naca da dxundxu quebe dxundxu da li. ⁷ Che dxundxu da li da naca cheē xel-la' naxaní', ca naca Dios, Bénnea' naquē' li

lazre', ne zue' lu xel-la' naxaní', nadxa zúadxu tuze tudxu xetudxu, na' dxen chee Jesús, Zri'ine Dios, dxibe na dxi'u ca naca xúgute dul-la nabágadxu.

⁸ Che dxennadxu quebe nabágadxu dul-la, dxezí xéqueze cuínadxu, na' da li quebe zúale na dxi'u.

⁹ Che xrúalepedxu ca naca dul-la da nabágadxu, Dios naque' li lazre', ne xlátaje, na' chee le na' Le' gunite lawe' cheedxu ca naca dul-la da nabágadxu, ne quibe' dxi'u ca naca xúgute da sban da ba bendxu. ¹⁰ Che dxennadxu quebe nundxu dul-la, dxucá'anadxu Dios ca wen lazre', ne quebe ne sidxu du lázredxu ca naca dízra' chee'.

2

¹ Le'e, bi nazri'ite lazra', dxuzúaja' da nigá chee chee quebe gunle dul-la. Che nu benne' guné' dul-la, zua wenaba cheedxu lau Dios, Jesu-cristo, Benne' xlátaje. ² Le' gutie' waláz cheedxu chee gudúe' da nabágadxu lau Dios ca naca dul-la cheedxu, ne quegaze da nabágadxu dxi'u, san gudúe' da zaj nabaga xúgute bénneache.

³ Che dxuzúadxu dízra' ca naca da bdxixruj be'e Dios, nezdxu ba núnbeadxu Le'. ⁴ Che nu dxenná: Neda' núnbe'a Le', ne che quebe dxuzúe' dízra' ca naca da bdxixruj be'e Dios, benne' nigá naque' wen lazre', ne quebe dxenné' da li. ⁵ Che nu benne' dxuzúe' dízra' ca naca da bdxixruj be'e Dios, benne' nigá nazri'ine' Dios du lazre'. Che dxundxu caní nezdxu ba zúadxu tuze nen Le'. ⁶ Bénnea' dxenné' naque' tuze nen Dios dxal-la' gaque' ca guca Jesús.

Tu da cube da bdxixruj be'e Jesús

⁷ Le'e, bi nazrí'itē lazra', dxuzúaja' cheeḷe ca naca da dxenná na dxal-la' zri'idxu le sa' ljwézredxu. Quebe naca na tu da cube da bdxixruj bea Dios. Naca na da gula na' da ba guzile nédxudaute. Da gula da bdxixruj bea Dios naca na dizra' da ba bénequezle. ⁸ Naca na ca dxuzúaja' cheeḷe tu da cube da dxixruj bea Dios, da naca béaqueze na naca da li lawe' da ben Jesús ca naca na, ne lawe' da dxunle le'e ca naca na. Caní naca na lawe' da ba dxusení' xel-la' naxaní' li chee xel-la' zri'i lazre' lu xichaj lázrdaudxu, da dxegúa na da naca na chee da chul-la.

⁹ Che nu benne' dxenné' dxuné' da naca na chee xel-la' naxaní', ne che dxecuídené' le sa' ljwezre', benne' nigá ne dxedé' lu da naca na chee da chul-la. ¹⁰ Benne' nazrí'ine' le sa' ljwezre' dxuné' da naca chee xel-la' naxaní', ne quebe dxuné' da guzríá xi na le sa' ljwezre'. ¹¹ Bénnea' quebe chawe' dxelé'ene' le sa' ljwezre', lu da naca na chee da chul-la zua bénnea', ne lu da na' dxedé', ne quebe nézene' ga zéaje' lawe' da dxucá'ana da chul-la le' ca tu benne' la chul-la.

¹² Le'e, bi nazrí'itē lazra', dxuzúaja' cheeḷe lawe' da ba bnite lau Dios cheeḷe ca naca dul-la cheeḷe, lawe' da gute Jesucristo waláz cheedxu. ¹³ Le'e, benne' nazrí'itē lazra', dxuzúaja' cheeḷe lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheeḷe lawe' da ba bsanle da dxenná da xriwe'.

Le'e, bi nazrí'itē lazra', dxuzúaja' cheeḷe lawe' da ba núnbeale Xradxu Dios.

¹⁴ Le'e, xruze xrna', dxuzúaja' cheeḷe lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheeḽe lawe' da nácale benne' wal-la, ne dizra' cheeḽ Dios nápaḽe, ne bsaḽe da dxenná da xriwe'.

¹⁵ Quebe sa lázrele da caleḽa ca' da zaj naca na cheeḽ xezr la xu nigá, ne quegá da zaj de lu xezr la xu nigá. Che nu benne' dxezá lazre' da zaj de lu xezr la xu nigá, quebe nazri'ine' Xradxu Dios. ¹⁶ Da caní zaj naca na cheeḽ xezr la xu nigá, da dxezá lázredxu da dxezaca ba lazre' beḽa' dxen cheedxu, ne da dxezaca ba lazre' xiaj laudxu, ne ca naca xel-la' dxucá'ana szren cuina cheeḽ da nápadxu. Xúguteḽ da caní quebe zaj naca na da dxunna Dios, san zaj naca na cheeḽ xezr la xu nigá. ¹⁷ Ba za zra xuzre lazre' xezr la xu nigá, ne ca naca da dxezá lázredxu da naca na cheeḽ xezr la xu nigá. Bénnea' dxuneḽ da dxaca lazre' Dios wazúatecaze'.

Ca naca da li, ne da wen lazre'

¹⁸ Le'e, bi nazri'iteḽ lazra', zra caní zaj naca na zra bzeḽe. Ba bénele gulé'e laweḽ benne' tábageḽ Cristo. Neda' dxapa' le'e na'a, bache belelá' benne' zanteḽ benne' dxeledábageḽ Cristo. Cheeḽ le na' nezdxu ba zúadxu zra bzeḽe. ¹⁹ Benne' caní belexedxúajquezeḽ ládujla dxi'u. Da líqueze quebe gulaqueḽ tuze nen dxi'u. La gulaqueḽ tuze nen dxi'u, na' belexegá'anaḽquezeḽ dxi'u. Caní guca cheeḽ nezdxu quebe zaj naca xúguteḽ tuze nen dxi'u.

²⁰ Ca naca cheeḽe le'e, ba zúaleḽ Be' Lá'azxa le'e, Bénnea' gusel-la Xradxu Lá'azxa. Cheeḽ le na' ba nézele xúguteḽ da caní. ²¹ Dxuzúaja' cheeḽe da nigá lawe' da ba nézele da li, ne quegá dxennia' quebe nézele da li. Ba nézquezle le'e quebe dxun lazre' Bénnea' naqueḽ da li.

²² ¿Nuzra' naca benne' wən lazre'? Naca bēnnea' dxenné' Jesús quebe naque' Cristo, Benne' nase-la Dios. Benne' wən lazre' nigá dxenné' Dios quebe naque' Xra Jesús, ne Jesús quebe naque' Zri'ine Dios. ²³ Xúgute benne' dxeleñné' Jesús quebe naque' Zri'ine Dios, Dios quebe zúaleñe' benne' ca'. Bēnnea' dxexechebe' Jesús naque' Zri'ine Dios, Dios zúalequeze' bēnnea'.

²⁴ Chee le na', le cu'u lu xichaj lázrdaule dizra' da ba bénele nédxudaute. Che da ba bénele nédxudaute zua na lu xichaj lázrdaule, le'e súatequezele tuze nen Zri'ine Dios, ne nen Xradxu Dios. ²⁵ Da nigá naca na da nachebe lazre' Dios, gunne' dxi'u xel-la' nabán zeajlí canna.

²⁶ Ba bzuaja' chee da nigá ca naca chee benne' ca' dxelezi xē'e le'e. ²⁷ Na'a zúale Be' Lá'azxa le'e, Bēnnea' gusel-la Jesucristo chee, na' Be' Lá'azxa nigá zue' xichaj lázrdaule. Chee le na' quebe nachínele nu gusede le'e lawe' da dxusede Be' Lá'azxa le'e ca naca xúgute da caní, na' da dxusedene' le'e naca na da lí, ne quebe naca na da wən lazre'. Chee le na', le súatequeze tuze nen Cristo ca naca da ba bsede Be' Lá'azxa le'e.

Ca naca chee benne' zaj naque' zri'ine Dios

²⁸ Na'a, bi nazri'ite lazra', le súatequeze tuze nen Cristo, chee súadxu li lazre' gate xelá' Le', ne quebe xedué'edxu lau Le' gate xelé'e. ²⁹ Ba nézele naca xlátaje Dios. Chee le na' dxal-la' nézele xúgute benne' ca' dxelúnqueze' da naca na xlátaje zaj naque' zri'ine Dios.

3

¹ Le nna' xque ca nazrí'ile'e Dios dxi'u lawe' da nazí ladxu bi chee Dios, ne caní nácadxu. Chee le na' quebe zaj neze bénneache lu xezr la xu nigá da nácadxu lawe' da quebe belúnbe'e Jesús. ² Le'e, bi nazrí'ite lazra', na'a nácadxu bi chee Dios. Quebe ne gulé'e lawe' da gácadxu. NezdXu gate xelá' Le', gácadxu ca naca Le' lawe' da lé'edxu Le' ca nácaqueze Le'. ³ Nu benne' dxebeza lazre' gaque' ca naca Jesús dxue lazre' gaque' du lazre' ca naca Jesús, naque' du lazre'.

⁴ Nu benne' dxune' dul-la quebe dxuzúe' dizra' ca naca da bdxixruj be'e Dios lawe' da naca dul-la da dxdábaga da bdxixruj be'e Dios. ⁵ Ba nézele bla' Jesucristo chee gudúe' dul-la nabágadxu, ne Le' quebe bi dul-la bene'. ⁶ Xúgute benne' zaj zúatequeze' tuze nen Jesús quebe dxelune' dul-la, na' xúgute benne' dxelune' dul-la quebe ne xeelé'ene' Cristo, ne quebe ne xelúnbe'e Le'. ⁷ Le'e, zrí'ina'dau', quebe güele lataj nu si xé le'e. Bénnea' dxune' da xlátaje, xlátaje naque', ca naca Dios, naque' xlátaje. ⁸ Benne' dxune' dul-la naque' chee da xriwe' lawe' da dxun da xriwe' dul-la nédxudaute. Chee le na' bla' Zrí'ine Dios, chee bzria xi'e xúgute da nun da xriwe' lu xezr la xu nigá.

⁹ Xúgute benne' zaj naca bi chee Dios quebe dxelune' dul-la lawe' da zúaletequeze Be' chee Dios benne' ca'. Chee le na' québedxa gaca xelezúe' xelune' dul-la lawe' da zaj naque' bi chee Dios. ¹⁰ Naca bea nu naca bi chee Dios ne nu naca bi chee da xriwe'. Bénnea' quebe dxune' da xrlátaje ne quebe nazrí'ine' le sa' ljwezre' quebe naque' bi chee Dios.

Dxal-la' zri'idxu tu xetudxu

¹¹ Da nigá naca na dizra' da ba bénequezle nédxudaute, da dxenná na: Dxal-la' zri'idxu tudxu xetudxu. ¹² Quebe gundxu ca ben Caín, bi na' gúcabe' chee da xriwe', na' bétebe' bi bíchebe'. ¿Bizr chee na' bétebe' lebe'? Bétebe' lebe' lawe' da naca da zrinnaj da ben Caín, na' da ben bi bíchebe' naca na da xrlátaje.

¹³ Le'e, benne' bícha'dau', quebe xebánele che bénneache lu xezr la xu nigá dxuluzúe' le'e chalá'ala. ¹⁴ NezdXu ba bdxúajdxu lu na' xel-la' gute, ne ba guxú'udxu lu xel-la' nabán lawe' da nazri'idxu bíchedxu ca'. Bénnea' quebe nazri'ine' bíchedxu ca' zúaqueze' lu xel-la' gute. ¹⁵ Bénnea' dxuzúe' chalá'ala bíchedxu ca' naque' ca tu benne' dxute benne', na' ba nézquezle le'e nu benne' dxute benne' quebe nape' xel-la' nabán zeajlí canna. ¹⁶ Ba nezdXu da naca xel-la' zri'i lazre' lawe' da bzanne Jesucristo xel-la' nabán chee', na' gutie' waláz cheedxu. Cá'anqueze dxi'u dxal-la' guzúadXu xel-la' nabán cheedxu chee gácaledxu bíchedxu ca'. ¹⁷ Che tu benne' nape' xel-la' gunní'a da naca na chee xezr la xu nigá, ne che dxelé'ene' le sa' ljwezre' dxexáxrjene', na' che quebe xexache lazre' le', benne' nigá quebe nazri'ine' Dios. ¹⁸ Le'e, zrí'ina'dau', dxal-la' zri'idxu tudxu xetudxu, quegá nen dízra'ze, ne quegá nen da nnézedxu. Dxal-la' gúntequezdxu na, na' gaca bea na da li nazrí'idxu bíchedxu ca'.

Zua zri lárdaudxu lau Dios

¹⁹ Che gundxu caní ba nezdXu nácadXu chee da li, na' sua zri lárdaudxu lau Dios, ²⁰ gate zua tu da dxagu na zria lu lárdaudxu, lawe' da nezdXu

naca Dios zrendxa ca lázrdaudxu. Le' nézquezne' ca naca da dxundxu. ²¹ Ca'an naca, bi nazrí'ite lazra', che quebe zua tu da dxagu na zria lu lázrdaudxu, waca sua zrize lázrdaudxu lau Dios, ²² na' Le' gunne' dxi'u xúgute da nábadxu lawe'. Ca'an gaca lawe' da dxuzúadxu dizra' da bdxixruj be'e Dios, ne dxundxu da dxezaca ba lazre' Le'. ²³ Da bdxixruj be'ene' dxi'u naca na chéajledxu chee Jesucristo, Zri'ine Dios, ne zri'idxu tudxu xetudxu ca bdxixruj be'e Le'. ²⁴ Bénnea' dxuzúe' dizra' da bdxixruj be'e Le' zúalequeze' Dios, na' Dios zúalequeze' bénnea'. Ba nezdxu Le' zúalequeze' dxi'u lawe' da bache benne' dxi'u Be' chee'.

4

Naca bea Be' chee Dios

¹ Le'e, bi nazrí'ite lazra', quebe chéajle chee xúgute benne' dxelenné' zúale Be' chee Dios le'. Le nna' xque ca naca da dxulusédene' chee nézele che zúale' Be' chee Dios le'. Caní dxal-la' gunle lawe' da ba belelá' benne' zante, benne' wen lazre', dxelenné' dxuluchálaje' waláz chee Dios. ² Caní gaca nézele che zúale Be' chee Dios tu benne'. Xúgute benne' dxelexechebe' ba bla' Jesucristo, ne guque' bénneache, benne' caní zaj naque' chee Dios. ³ Xúgute benne' quebe dxelexechebe' ca guca Jesucristo quebe zaj naque' chee Dios. Zaj naque' chee bénnea' dxedábague' Jesucristo. Ba bénele gulé'e lawe' bénnea', na' na'a ba zue' lu xezr la xu nigá.

⁴ Le'e, bi nazri'ite lazra', nácale chee Dios, ne bache bzúale chalá'ala benne' ca' dxelezí xe'e lawe' da szrendxa naca Be' zúale na le'e ca be' zua na

lu xezr la xu nigá. ⁵ Benne' ca' zaj naque' chee xezr la xu nigá. Chee le na' dxuluchálaje' chee da naca na chee xezr la xu nigá, na' benne' zaj zre'e xezr la xu nigá dxelenne' da dxuluchalaj benne' ca'. ⁶ Dxi'u nácadxu chee Dios. Benne' zaj núnbe'e Dios dxuluzé nague' cheedxu. Benne' quebe zaj naque' chee Dios quebe dxuluzé nague' cheedxu. Chee le na' nezdxi nu benne' zúale Be' chee xel-la' li le', ne nu benne' zúale be' chee da dxezí xe na le'.

Tu dxúnzqueze Dios da naca chee xel-la nazrí'i lazre'

⁷ Le'e, bi nazrí'ite lazra', dxal-la' zri'idxi tudxu xetudxu lawe' da dxunna Dios dxi'u xel-la' nazrí'i lazre' na'. Xúgute benne' zaj naque' zri'i lazre' caní zaj naque' zri'ine Dios ne zaj núnbe'e Dios. ⁸ Bénnea' quebe naque' zri'i lazre' caní quebe núnbe'e Dios lawe' da tu dxúnzqueze Dios da naca chee xel-la nazrí'i lázre'. ⁹ Naca béaqueze Dios nazrí'ile'ene' dxi'u lawe' da gusel-le' Zrí'ine' tu licha' lu xezr la xu nigá chee zrué'edxi xel-la' nabán da naca na chee Zrí'ine' na'. ¹⁰ Xel-la' zri'i lazre' li naca na caní: Quegá dxi'u na' bzri'idxi Dios. Le' bzri'ine' dxi'u, ne gusel-le' Zrí'ine' chee guque' da gudúa na da nabágadxu lau Dios lawe' da nabágadxu dul-la.

¹¹ Le'e, bi nazrí'ite lazra', che Dios bzri'ine' dxi'u caní, dxi'u dxal-la' zri'idxi tudxu xetudxu. ¹² Quebe nu ne le'e Dios, san che zri'idxi tudxu xetudxu, Dios zúaqueze' lu xichaj lázrdaudxu, na' xel-la' zri'i lazre' chee' dxun na li lazre' xel-la' zri'i lazre' cheedxu. ¹³ Nezdxi nácadxu tuze nen Dios, na' Dios naque' tuze nen dxi'u lawe' da bzué' Be' chee' lu lázrdaudxu. ¹⁴ Ba blé'entu', ne dxuzentu'

le'e ca naca da ben Xradxu Dios, gusel-le' Zrí'ine' chee bedajselé' bènneache chee xezr la xu nigá.

¹⁵ Bénnea' dxexechebe' naca Jesús Zrí'ine Dios, Dios zúalequeze' bènnea', na' le' zúalequeze' Dios.

¹⁶ Ba núnbeadxu ca nazrí'i Dios dxi'u, ne ba guxéajlëdxu nazrí'ine' dxi'u. Tu dxúnzqueze Dios da naca chee xel-la nazrí'i lazre', na' bènnea' naque' zrí'i lazre' caní zúalequeze' Dios, na' Dios zúalequeze' le'. ¹⁷ Caní dxaca li xel-la' zrí'i lazre' cheedxu, chee sua zrize lázrdaudxu lu zra guzrí'a xi' Dios bènneache, benne' ca' dxelune' da calela, lawe' da nácadxu lu xezr la xu nigá ca nácaqueze Jesucristo. ¹⁸ Bénnea' naque' zrí'i lazre' caní quebe dxezrebe' da gaca na lu zra na'. Xel-la' zrí'i lazre' li dxebéaj na chalá'ala xel-la' dxezrebe na'. Nu benne' dxezrebe' dxebeze' bi da saque', na' bènnea' dxezrebe' quebe dxaca li xel-la' zrí'i lazre' chee'.

¹⁹ Dxi'u nazrí'idxu Dios lawe' da bzrí'i Dios dxi'u nédxudaute. ²⁰ Che nu benne' dxenné': Nazrí'ida' Dios, ne che benne' nigá dxuzúe' chalá'ala le sa' ljwezre', dxun lazre'. Che quebe nazrí'ine' le sa' ljwezre', bi dxelé'etene', ¿ájazra guné', zrí'ine' Dios, ne quebe dxelé'ene' Le'? ²¹ Dios ba bdxixruj be'ene' dxi'u caní, gunné': Bénnea' nazrí'ine' Dios, zrí'iquezne' le sa' ljwezre'.

5

Ca bdxúajdxu chawe' lu xezr la xu nigá

¹ Xúgute benne' dxeléajle'e Jesús naque' Cristo, Benne' nase-la Dios, benne' caní zaj naque' bi chee Dios, na' che zaj nazrí'ine' Xradxu Dios, dxal-la' xelezrí'iquezne' xúgute benne' zaj naque' bi chee Dios. ² NezdXu nazrí'idxu benne' zaj naque' bi

chee Dios chete nazri'idxu Dios, ne dxundxu ca naca da dxi'e dxi'u. ³ Che da li nazri'idxu Dios, dxundxu da dxi'e dxi'u. Da dxi'e dxi'u quebe naca na stebe. ⁴ Xúgute benne' zaj naque' bi chee Dios dxedxúaje' chawe' lau da calela da dxaca na lu xezr la xu nigá. Dxedxúajdxu chawe' lau da calela da dxaca na lu xezr la xu nigá lawe' da dxéajledxu da naca na chee Jesucristo. ⁵ Benne' dxedxuaje' chawe' lau da calela da dxaca na lu xezr la xu nigá naque' bénnea' dxéajle'e naca Jesús Zrí'ine Dios.

Da dxenná Dios ca naca chee Zrí'ine'

⁶ Guca bea Jesús naque' Cristo gate gudxúe' nisa, ne gate gulalaj dxen chee'. Quegá gudxúaze' nisa san cá'aqueze gulalaj dxen chee'. Be' chee Dios gudxixruj lie' da nigá, na' Le' dxuchálaje' da li. ⁷ Chunne' dxelixruj lie' chee da nigá xabáa, Xradxu Dios, ne Zrí'ine', ne Be' Lá'azxa, na' chunne' caní zaj naque' tuze. ⁸ Cá'aqueze chunna da dxelixruj li na chee da nigá lu xezr la xu nigá, Be' Lá'azxa, ne da guca gate gudxúa Jesús nisa, ne da guca gate gulalaj dxen chee', na' da chunna caní, túzqueze da dxelixruj li na. ⁹ Dxéajledxu da dxelixruj li bénneache, san da nadxixruj li Dios zácadxa na, na' Le' nadxixruj lie' naca Jesús Zrí'inequeze'. ¹⁰ Bénnea' dxéajle'e naca Jesús Zrí'ine Dios ba guzi'e xichaj lázrdawe' da ba gudxixruj li Dios, san bénnea' quebe dxéajle'e chee Dios dxucá'ane' Dios ca tu benne' wen lazre', lawe' da quebe guxéajle'e chee da ba gudxixruj li Dios ca naca chee Zrí'ine'. ¹¹ Da nigá naca na da nadxixruj li Dios, dxenné' ba benne' dxi'u xel-la' nabán zeajlí canna, na' xel-la' nabán nigá za na lu na' Zrí'ine', Jesucristo.

¹² Bénnea' zua Zri'ine Dios na' lu xichaj lázrdawē' zúalē xel-la nabán nigá lē', san bénnea' quebe zua Zrí'ine' lu xichaj lázrdawē' quebe zúalē xel-la' nabán nigá lē'.

Ca gaca nezdxu nápadxu xel-la' nabán zeajlí canna

¹³ Da nigá dxuzúaja' cheēle dxéajlēle cheē Zri'ine Dios cheē nézele zúalē xel-la' nabán zeajlí canna le'e.

¹⁴ Dxuxrén lázredxu Dios lawe' da nezdxu che bi nábadxu lau Lē' ca naca da dxaca lazre' Lē', Léqueze' wenne' cheēdxu. ¹⁵ Lawe' da nezdxu Dios dxenne' cheēdxu, cá'unqueze ba nezdxu gunna Lē' da ba gunábadxu lau Lē'.

¹⁶ Che tu benne' dxelé'ene' dxun bíchedxu dul-la da quebe nua na xel-la' gute, dxal-la' nabe' lau Dios ne cheē bíchedxu na', na' Dios gunézruje' xel-la' nabán cheē', che naca na tu dul-la da quebe nua na xel-la' gute. De dul-la da nua na xel-la' gute, na' quebe dxennía' ná bale lau Dios ne cheē bénnea' dxune' dul-la nigá. ¹⁷ Xúgute da calela naca na dul-la, na' de dul-la da quebe nua na xel-la' gute.

¹⁸ Nezdxu nu benne' naca bi cheē Dios québedxa dxúnqueze' dul-la lawe' da dxuwía dxuxúe Zri'ine Dios lē', na' da xriwē' quebe bi dxezeque gunē na lē'.

¹⁹ Nezdxu nácadxu bi cheē Dios, na' xúgute benne' zaj naca cheē xēzr la xu nigá zaj xu'e lu na' da xriwē'.

²⁰ Nezdxu ba bla' Zri'ine Dios, ne ba bzéajni'ine' dxi'u cheē gúnbeadxu Dios li. Nácadxu tuze nen Bénnea' naque' li lazre', Jesucristo, Zri'ine Dios.

Benne' nigá naque' Dios li, ne Léqueze' naque' xel-
la' nabán zeajlí canna da zúale na dxi'u. ²¹ Le'e,
zrí'ina'dau', le guxúe xanne' cuínale chee quebe
gucá'ana szrenle bedau' xiaj xaga ca'.

Xela wezria cube nen salmo ca’
New Testament and Psalms in Zapotec, Tabaa
(MX:zat:Zapotec, Tabaa)

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
80626b72-93df-58ae-9f5e-9d86733fab46